

Date – 05/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Lunglei khawpuia tui harsatna chuan zual lam a pan zel.
2. Mizoram chu hmarchhak state zinga tunlai thiamna hmanga inbiakpawhna lama hmasawn ber state a nih thu Economic Survey 2024-2025 ah tarlan a ni.
3. Prime Minister Narendra Modia chuan nimin khan BIMSTEC Summit ah 21-poin Action Plan a puang
4. Union Cabinet chuan Vibrant Village Programme-2 a pawm.



LUNGLEI WATER SCARCITY

Lunglei khawpuia tui harsatna chuan zual lam a pan zel a, Sorkar atanga PHE in an sem bak chu mipui chhawmdawlna turin ruahmanna siam a la awm lo.

Lunglei khawpuiah thla khat dawn lai tui a haw mumal loh avangin tui harsatna chuan zual lam a pan zel a, PHE Department sawi danin kumina tui hna kang chu kumdang aiin a nasat thu leh ruah a sur mai loh chuan buaina lian zawk an tawk thei dawn an ti a, pump na tur khawl nei tha mahse a pump tur tui a awm miau loh avangin harsatna lian tak an tawk mek an ti a, Tlawng luia Concrete Gravity Dam siam mek chu a hnathawktu Contractor chuan zawh hun tur a tihah a zawh hman loh avangin thla 6 dang atan pawhsei sak a ni a, tun dinhmunah khawpui chhungah tuikhur 90 a awm mek thu sawiin a thianghlim em tih enfiah zel a ni an ti a, a tam zawk chu thinghlimlo anih vangin Laboratory-ah test mek niin tuikhur tui chu ei leh in rawngbawl nan a ring chuan chhuangso hram se an duh tih an sawi baw.

PHE hotute sawi danin ram chereu nasat avangin tui hna kang chat tam tak a awm an ti a, tun dinhmunah tui connection 16,012 awm mekin consumer te hnenah tui sem chhuak vek tur chuan thla khat dawn nghah a ngaih tur thu an sawi baw.

Voicecast –

Lunglei khawpuiah Tui a harsat chhoh zel avangin mipui nunphungah harsatna tam tak a thleng a, thla khat chhung a haw mumal loh avangin tui thianghlim in tur a tam tawhlo hle a, intur tui Mineral Water pawh dawr atanga lei tam tak awm tawhin tui hman tur pawh motor hmanga chawi lei an tam hle a, Sawrkar thuneitute chuan ram chereu nasat avangin tui hna kang a tam thu sawiin Lunglei tui lakluhna tur hnathawh mek chu zawh fel ala nihloh avangin tui hi a harsat chhunzawm zel a ni.

(Thangmingliana Renthlei, PTC Lunglei)



CM

Chief Minister Pu Lalduhoma'n tun hnaia ruihhlo tam tham tak mantu Sub Inspector Zirthanga chu a thawhpuite nen chawimawina an hlan dawn tih a sawi.

Nimina Tuirihiau Run, Buangpuia Vantawng Group YMA Inkhawmpui vawi 26-na a hmanpuinaah, Bialtu MLA leh Chief Minister Pu Lalduhoma chuan thu sawiin Ruihhlo dona kawngah sorkar chuan tha a thlah dawn lo a ti a, YMA chu mipuite nun kawng siamthatna leh khawtlang nun venhimna kawnga an thawhpui pawimawh ber an nih avangin, mawhphurhna sang tak an chelh tih hre reng turin a chah a ni.

Pu Lalduhoma chuan Thenzawl leh Serchhip damdawiin chu khawl thara tuam chak a ni dawn a ti a, Thenzawla PWD Division dah thar turin sawrkarin hma a lak thu sawiin Vantawng khawhthlaa Rope Way siam thuai an tum thu a a sawi bawk.

Chief Minister chuan Muanna Khawpui (peace city), mipui nuai sawm vel chenna tur Thenzawl leh a chhehvela dinna tur Prime Minister Pu Narendra Modi hnena a dil chu hmuh theih an in beisei a ti a, 16th Finance Commission-ah a sawi tawh thu sawiin, tun dinhmunah Ministry of Housing and Urban Affairs (MoHUA) chuan master plan siamna tur cheng vaibelchhe sawm a phalsak a, hun erawh a la duh deuh dawn niin a sawi a ni.

Pu Lalduhoma chuan ram hmasawna chu sawrkarin a ngaih pawimawh ber ni mah se, mipuite chhungril nun a chhiat si chuan hmasawna tluantling a ni theiin an hre lo a ti a, hei vang hian mipui sukthlek siamna keng tel hmalakna an kalpui zel dawn tih a sawi. Vantawng Group YMA-ah hian branch 13 awmin, member hi 7523 an awm a. member 62 boral ta te chu nimin rorel inkhawmah sun an lo ni tawh a ni.

(DESK)



MIZORAM TOPS NE IN TELECOMMUNICATIONS

Ram ei leh bar dinhmun sawifiahna Economic Survey 2024 atanga 2025 inkarin a tarlan danin Mizoram chu hmarchhak state zinga tunlai thiamna hmanga inbiakpawhna lama hmasawn ber state a ni.

Ministry of Development of North Eastern Region thuchhuah tarlan danin Mizoram chu tunlai thiamna hmanga inbiakpawhna lama a hmasawna chu za zela 113.29 a ni a, hei hi thingtlang ah za zela 94.19 niin khawpuiah za zela 128.83 a ni.

Rampum huapa Sawrkar laipuiin survey a neih atanga tarlan danin sawrkar kum liam ta ah thingtlang lamah broadband hmasawna nasa tak a thleng a, za zela 71.4 ni thin kha za zela 79.54 in hma a sawn a ni.

Voicecast

Mihring nuai 12 vel ber awmna Mizoram ah hian mobile phone connection nuai 16 chuang a awm a, hei hi State Economics & Statistics in kum 2023-a a tarlan dan niin Mizoramah inbiakpawhna lama hmasawna a thleng nasa hle a, Tunlai khawvel hmasawna leh changkanna in a ken tel internet leh phone hmanga

inbiakpawhna hi mi tu pawhin kan hmang nasa tawh em em a, Pi Pu ten an lo suangtuah thiam phak bakin kan nunphung a inthlak a, kan rilru put hmang leh khawvel thlir dan pawh nasa takin a inher danglam tawhin tunlai thiamna in kan nunah tel ve na tam tak a nei a ni.

(DESK)



LENGPUI BRIDGE

Aizawl atanga Lengpui Airport panna kawng Sihhmui kaia Tlawng Lei dawh that hna thawh mek chu hnathawktuten tluang tak leh ngawrh zawka an thawh theih nan naktuk Pathianni tlai dar 4 atanga Thawhlethni April ni 8 tlai dar 5 inkara khar a ni dawn.

Aizawl SP Pu Rex Zarzoliana Vanchhawng thuchhuah tarlan danin April ni 6 leh ni 8 inkarah hian lirthei eng chi mah kal tlang phal a ni dawnlo a, Lengpui Airport leh Mamit lama kal tur ten Buichali lama kal a ngai dawn tih sawiin thupek chu mipuite zawm turin a ngen tih a sawi bawk.

Aizawl atanga Lengpui Airport panna kawng Sihhmui kaia Tlawng Lei dawh mek chu dawh hna hi nikum lam atangin ngawrh taka thawh alo ni tawh a, nikum december thla khan load test a nih laiin a Lei khai kangtu cable pakhat a chah avangin lei dawhkai hna chu hun engemaw chen a khaihlak a, a helna kawngah LMV chin hnuai lam tan kal theiha siam niin Motor lian chu Buichali lama kal tura tih anlo ni tawh a ni.

Voicecast

Aizawl atanga Lengpui Airport panna kawng Sihhmui kaia Tlawng Lei dawh hi nikum October ni 30 atanga November ni 30 inkara zawh hman tura ruahman ni mahse nikum khan lei dawh kai an tumna lamah lei khai kangtu a chah avangin lei dawh hi hun engemaw chen a khaihlak rih a, kuminah Lei dawh kai tuma nasa taka hmalak thar niin PWD chuan an thu ngaichang hrâm turin mipuite an ngen tih sawiin an harsatna chu hriatthiampui turin an duh tih an sawi bawk.

(DESK)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PM IN BIMSTEC

Prime Minister Narendra Modia chuan nimin khan BIMSTEC Summit ah 21-poin Action Plan a puang. Bangkok-a Bay of Bengal Initiative fro Multi-Sectoral Technical and Economic Cooperation (BIMSTEC) Summit vawi 6-naah PM Modia chuan kawng hrang hranga thawhhona tur ruahmanna hi a tarlang a. Pu Modia chuan BIMSTEC chu khawvel siamthatna tura hmun pawimawh tak anih thu a sawiin thawhhona tha zawk a awm theih nan tan lak a tul thu a sawi a. BIMSTEC ramte chu sumdawnna lama thawhhona uar lehzual tura sawmin BIMSTEC

Chamber of Commerce din anih thu a puang a. Kuntina BIMSTEC Business Summit neih thin a nih tur thu a sawi bawk a ni.

Pu Modia chuan BIMSTEC Maritime Transport Agreement ziah a ni chu lawmawm atih thu sawiin BIMSTEC Bangkok Vision 2030 leh Report of BIMSTEC Eminent Persons Group pawm a ni chu lawmawm atih thua sawi bawk a ni.

(Newsonair)



PM

Prime Minister Narendra Modia chuan ni thum cham turin Sri Lanka a thleng. Tun tum hi Sri Lanka a tlawh wawi 4 na tur a ni a. Prime Minister Modi hi Colombo khawpuiah Sri Lankan minister ten an lo dawngsawng a. Heng zingah hian Minister of Foreign Affairs Vijitha Herath leh Health Minister Dr. Nalinda Jayatissa te pawh an tel a ni. A cham chhungin Sri Lanka ram hruaitute nen an inkawm ang a, India puihnaa Sri Lanka-a project thawhte a hawng dawn bawk a ni.

(Newsonair)



CABINET

Union Cabinet chuan Vibrant Village Programme-2 a pawm. Union Information and Broadcasting Minister Ashwini Vaishnaw chuan he programme-ah hian zaa za sawrkar laipui sum hman tur anih thu sawiin sum ruahman hi cheng vaibelchhe sang 6 leh 839 a ni a, Mizoram pawh tiamin ramria awm block hrang hranga thingtlang kuate tan hmasawna hna thawh a ni ang a ti.

Union Cabinet chuan Ministry of Railway hnuaiyah project pali cheng vaibelchhe sing 1 sang 8 leh 658 senga thawh tur a pawm. New Delhi-a chanchinbumite kawmin Union Information and Broadcasting Minister Ashwini Vaishnaw chuan heng project te hian state pathum Maharastra, Odisha leh Chhatisgarh-a district 15 a huam dawn a. Tuna Indian Railway hnuaiyah km 1247-a thui rel kawng awmsa chu a ti pung dawn a ni. Project hnuaiyah hian Sambalpur-Jarpad line thumna leh line li na, Jharsuguda- Sason line 3 na leh line 4 na, Kharsia-Naya Raipur- Parmalkasa line 5 leh line 6 na leh Gondia-Balharshah Doubling na turte a ni a. Union Minister chuan zin veivahna leh bungraw thawn pawh a awlsam phah sawt dawn tih a sawi a ni.

(Newsonair)

